



- Sontada dal grup de liturgia en dedemesaledema, ai 3 de forá, ales 20:00.
- Sontada dal consei d'aministrazion en jöbia ai 4 de forá ales 20:00: endünada con la comisciun de cortina, cunc dla dlijia, program 2016, desvalies.
- Fora dal protocol dla sontada dal consei pastoral (26.01.2016)

**Iulibeo dla Misericordia:** an ciara da meter da jí funziuns/messes/liturgia dla parora ia por l'ann con le tema zentral dal Ann "Ann dla Misericordia"; an nen baiará plü avisa ciamó con le consei de Liturgia.

**www.unitepastorala.org:** an se fajará en ponsier che co podess s'an sorantó da ajorné la plata internet dl'Unité Pastoral tla pert dedicada a nosta ploania.

**Zelebraziun dla Parora de Dio:** an baia codio sora le tema "Liturgia dla Parora" y an nen baiará ciamo plü avisa en dedemesaledema te na sontada con le consei de liturgia por tlarí val' punc nia daldöt tlers.

**Guida por la dlijia:** an ciara da meter a jí en curs/ores de istruziun adöm al consei de formaziun sora la architetoira, la storia y le tomp de nosta dlijia.

**Corones por defunc:** al é gnü ciamo en iade tlarí le tema dles coronas por i defunc dan la sopoltöra. **La pröma sera** vegnel dit la corona te dlijia, ales 19:30 o atira do messa, ince sce le defunt é te ciasa, (samben pól ince gní dit la corona te ciasa, sce le defunt é danló). **Les atres seres** vegnel dit la corona ma te ciasa dal defunt, sce al é danló; sce al é endere te spitol o te Ciasa de Palsa vegnel ince cöstes seres dit la corona te dlijia.

Sce la porsona defunta é maridada, él i **Omi** o les **Fomenes** co dij dant, sce la porsona defunta è en jon/a jona nia maridé/maridada cina 35 agn, la **Joneza**.

- **Joneza da Paur:** la Joneza da Paur met a jí en **curs da balé polka, walzer, boarischer y fox** con Isidoro Clara, dai 20 de forá ennant por 6 sabedes, ales 20:30 te Ciasa dles Uniuns. Cost 30,00 € por membri y 50,00 € por i atri. Infos y prenotaziuns cina ai 13 de forá pa Jan de Brach ☎ 339 6758622.



## enformaziuns y termins

**KVW Seniorenclub:** en jöbia grassa ai 3 de forá, ales 3 domisdé, vegnel fat te salf dles manifestaziuns d'Al Plan na festa da carlascé; mascheres é benodüdes.

**Sorvisc ai Jogn:** le SaJ chir jogn y jones co á ligreza da laoré con mituns y mitans desco animadus/esses pa "Isté deboriada". Por informaziuns ☎ 0474 523070 o info@jogn.org. Termo por dé jö les domandes é le 29 de forá 2016.

**Portina por l'assistenza y la cura:** la portina nea por l'assistenza y la cura é daverta lönesc, dedemesaledema y vendres dales 14:00 ales 16:00, le dedolönesc y la jöbia dales 10:00 ales 12:00 te Raiun Sozio-Sanitar a Picolin. Atló él da ciagé enformaziun por döt ci co reverda l'assistenza y la cura de familiars y porsones co á debojügn de goern; le numer de telefon dertan i orars de daurida é ☎ 0474 586137.

**Döt le bun a:** Paola Rigo Vigg, Rina \* 01.02.1933  
y a düc chi co á santennom y compless i agn cöst'edema

**Impressum:** Ploania d'La Pli; redaziun Franz Rigo y Edith Willeit  
**Comunicaziuns** cina al dedemesaledema sera a Franz Rigo: ☎ 0474 500978 o ✉ ploania@gmx.net  
**Download plata:** www.unitepastorala.org o ince www.comun.mareo.bz.it



# Plata dla Ploania La Pli de Mareo Santa Maria dal Bun Consei

Ploan: Signor Heinrich Perathoner  
E-mail: ploania@gmx.net

Calogna Al Plan: 0474 501006  
Radio de Ploania: 93,00 Mhz



**VAL BADIA**  
www.unitepastorala.org

Ann C

31.01.2016 - 4. domegna ia por l'ann

n. 10

## Ci che Gejú iera sona atramonter

☞ **Ier 1, 4–5,17–19 | 1 Cor 12, 31 – 13, 13 | Lc 4, 21–30**

### Dal Vangelo do San Lúca:

Te chel tomp <sup>21</sup>á Gejú motü man tla sinagoga de Nazaret da splighé: Encö s'á ademplí la parora dla Scritöra ch'i eis der aldí con ostes oredles. <sup>22</sup>Söa pordica gnea tuta sö ben da düc; ai se fajea demorveia, coch'al sâ da baié y dijea: Ne n'é nia cösc le fi de Ojep? <sup>23</sup>Mo el ti á respognü: Dessogü mo tireise dant le proverb: Mede, varescete te enstes! Sce t'as belo fat a Cafárnaum de te' gran cosses, coch'i án aldí, spo fales ince atló te töa patria! <sup>24</sup>Y al á enjunté: Amen, i ves diji: Degün profet ne ven reconesciü te söa patria.

[...] <sup>28</sup>Canche la jont tla sinagoga â aldí cösc, s'ái dessené. <sup>29</sup>Ai é saltés sö y á paré Gejú fora de ciüté; ai l'á condüt cina sön l'ur dal crep, sön chel che söa ciüté ea gnüda fata sö, y ai orea le sciuré jö. <sup>30</sup>Mo el é passé amesa la meja fora y s'an é jü demez.

### I ponsun do

*Gejú encünda che al é gnü le tomp dla salveza. Mo la jont n'ò nia reconesce che le profet é danter ei y porta ince ciamó salveza a d'atri. Chi co ô veramonter vire do l'istruziun de Gejú, encunta ince aldedancö incomprenjiuns. Le Vangelo endere damana da nos düc na dezijiun.*



### I periun

*Signur nosc Dio, i se stontun da jí do a töa cherdada; i se temun ch'i romagnunse spo da susc. Deidesse jí to tru y tó la dezijiun por Gejú Crist, co vir y regneia tl'eternité.*

Wilhelm Egger "Sonntagsbibel"

☞ **Letöres dla 5. domegna ia por l'ann:**

**Is 6, 1–2a.3–8 | 1 Cor 15, 1–11 | Lc 5, 1–11**

Edema liturgica dai 31.01. ai 07.02.2016

<b>DOM 31.</b>	<b>FESTA DE SANT'UJÖP DA OIES</b> <b>4. domegna ia por l'ann - dai mass-media</b> 08:30 <b>gran messa</b> ciantada en onú y por l'interzesciun de Sant'Üjöp Freinademetz por döta la ploania, <i>♫ Ciantadús</i> <b>3<sup>a</sup> s.m. de sopoltöra</b> por + Florian Baldissera, corona dla comunité <i>oferta por i debojügn dla ploania</i>	<i>Giovanni Bosco, Eusebius, Hemma</i>
<b>Lön 01.</b> ► 07:30	<i>Brigitte, Sigibert, Ioana</i> <b>s.m.</b> dal ann por + Berto Ellecosta, Longega <i>(nia stada ai 25.1)</i>	
<b>Ded 02.</b>	<b>FESTA DLA PRESENTAZIUN DAL SIGNUR TAL TEMPL</b> <i>Santa Maria dles cianderes, dal Poch, (patrozinio)</i> <b>Dé dla vita consacrada</b> ► 08:30 <b>benedisciun dles cianderes</b> te plaza, prozesciun te dljia y <b>s.m.</b> de ringraziamont en onú de Santa Maria da Bun Consei, <b>s.m.</b> por + Pire Palfrader, Col   <b>benedisciun de San Blaje</b>	<i>Dietrich, Stefan, Alfred</i>
<b>Dem 03.</b> ► 19:30	<i>Blaje, Ansgar, Simeon, Hannah</i> <b>funziun con benedisciun de San Blaje</b>	
<b>Jöb 04.</b> 19:30	<i>Rabanus Maurus, Veronika, Christian, Johanna, Gilbert</i> <b>dé d'oraziun do vocaziuns</b> <b>s.m.</b> por +ti Vittoria y Mario Rubatscher, Framacia <b>s.m.</b> ad intenziun dla fam. Terza, André	
<b>Ven 05.</b> ► 18:45 19:30	<b>pröm vendres - Ingenuin y Albuin veschi de Jênn, Agata, Adelheid, Elisabeth</b> <b>signor ploan va a proveder</b> <b>poscibilité da se pissié</b> <b>s.m.</b> en onú de Sant'Ujöp da Oies por i püri, <b>funziun al Sacher Cör</b>	
<b>Sab 06.</b> 18:00 19:30	<i>Paul Miki y compagns, Dorotea, Amando</i> <b>s.m. prefestia a Al Plan</b> <b>s.m. prefestia</b> de ringraziamont dla fam. Hans Peter y Astrid Obojes, Hammerle <b>s.m.</b> en ringraziamont dla sanité	
<b>DOM 07.</b> 08:30 14:00	<b>5. domegna ia por l'ann – Dé dla vita</b> <b>gran messa</b> por döta la ploania y funziun dal mens a SantaMaria <i>oferta por i debojügn dla ploania</i> <b>funziun</b> de ringraziamont dla vita y benedisciun dai pici mituns	<i>Richard, Eugenio</i>
<i>ampola:</i>	por la fam. dla + Emma Rovara, Valdaora	
<i>ministronc:</i>	► da doman y domegna: David Willeit y Daniele Ellemunter ► da sera y domegna: Armin Taibon y Stefan Taibon	
<i>i recordun:</i>	Susanna Erlacher ved. Mühlmann + 31.01.2007 Berto Ellecosta + 01.02.2015	

 **Sant'Ujöp Freinademetz nes ensegna a perié:**



*Insciö, dij le Sant te na pordica: ciarede, sciöche i podéis contemplé la natöra, os che i sëis tres en contat cun ëra. Chësta é na bela oraziun y n meso saurí da coltívé cun de gran vari les virtús desvalies. Ciarede, os podéis uní chësta forma de oraziun cun osc laur. Insciö, vigni cossa che fajëis, devanta oraziun. Porvede y odares, al é saurí, ves fajará plajëi y podarëise sperimenté bel segn n gran tesur por le paraisc.*

www.freinademetz.it



**Unité Pastoral Val Badia – Pelegrinaje ala Porta Santa**



Por l'Ann Sant dla Misericordia é la Uniun Ploanies Ladines (Gardena y Val Badia) co envieia dúc al **pelegrinaje ala Porta Santa tal Dom da Porsenú en sabela ai 23 de aorí 2016.**

*Program:* ales 7:30 piunse ia con corieres dala Val Badia. I se encuntun ales 9:30 tla dljia de **Milland**. Do na picia funziun en onú de Sant'Ujöp da Oies junse en prozesciun cina tal **Dom da Porsenú**, olá che i passarun por la **Porta Santa** con **l'indulgenza** y festejun deboriada la **Santa Messa da festa**.

Do na **marena deboriada** junse ennant en prozesciun a **Neustift**, olá che al gnará tigní na funziun de ringraziamont. Ales 16:00 ca. gnunse derevers a ciasa con la coriera.

**Dúc é enviés da tó pert y da gní empara con la coriera; al va debojügn da s'anuzié cina al 1 de merz.**

⇒ Les **prenotaziuns por la ploania d'La Pli** ven tutes sò da maestra Brigitte: en dedolönesc ai **16**, en domegna ai **21**, en dedolönesc ai **23** y en domegna ai **28** de forá, dagnora na mesora dó messa te calogna bas etc. Pla prenotaziun é lince da paíé 25,00 € por iade y marena.



GEBETSMEINUNG  
DES PAPSTES FÜR

*Februar*

Wir beten für das Geschenk der Schöpfung, dass sie für die nächsten Generationen bewahrt wird.

Wir beten für die Völker Asiens in der Begegnung mit dem Evangelium.



*Un cuore pieno di Dio  
è un cuore felice  
che irradia e contagia  
con la gioia  
tutti coloro che sono  
intorno a sé:  
Io si vede subito!  
Quanto bene ci fa  
una buona dose  
di sano umorismo!*

Papa Francesco